

春秋左氏傳賈服注輯述

春秋左氏傳賈服註輯述卷五

嘉興李貽德學

閔公

年元傳因重固 服曰重不可動因其不可動而堅固之木疏

案說文重厚也呂覽貴生注重大厚大故不可動國語鄭語注
廣雅釋詁並云因就也固之言堅者詩天保傳云固堅也襄十
四年傳因重而撫之卽此意

以滅耿滅霍滅魏 服曰三國皆姬姓魏在晉之蒲坂河東也晉世

家注○元和郡縣志十
四引魏在晉之蒲坂

案襄二十九年傳霍楊韓魏皆姬姓也史記管蔡世家言文王

子霍叔處封於霍其後晉獻公時滅霍詩魏風譜魏者周以封同姓焉彼疏曰魏世家言周以封同姓子漢書地理志魏亦姬姓在晉之南河曲又河東郡皮氏自注耿鄉故耿國杜注亦云姬姓是三國皆姬姓也地理志河東郡蒲反自注故曰蒲應劭曰秦始皇東巡見長坂故加反云孟康曰本蒲也晉文公以賂秦後秦人還蒲魏人喜曰蒲反矣謂秦名之非也臣瓚曰秦世家云以垣爲蒲反然則本非蒲也又河北自注詩魏國晉獻公滅之以封大夫畢萬按此則魏非在蒲反矣詩譜云魏者虞舜所都之地彼疏引皇甫謐云舜所營都或云蒲坂卽河東縣是也然則魏都河北蒲坂近之故云虞舜所都之地謂境內有其

都耳據此則服亦卽境內言之也坂阪同

分之都城 服曰邑有先君之主曰都

晉世家注

案此莊二十八年傳文

而位以卿 服曰謂將下軍

同上

案周禮大司馬軍將皆命卿今申生將下軍是位以卿也

先爲之極 服曰言其祿位極盡於此也

同上

案周禮太宰職注班祿所以富臣下位爵次也又以八則治都

鄙注都鄙公卿大夫之采邑王子弟所食邑禮記禮運諸侯有

國采邑以處其子孫是不得嗣位者乃有都邑今申生封之曲

沃是祿已極矣白虎通爵篇王者太子亦稱土何舉從下升以

爲人無生得貴者士冠經曰天子之元子士也然則諸侯世子亦士列也今申生位以下卿是位已極矣表記注極猶盡也極盡於此言祿位止於此也

卜偃 賈曰卜偃晉掌卜大夫郭偃

同上

案國語晉語郭偃韋昭注郭偃晉大夫卜偃也是用賈義稱卜大夫者言爲掌卜大夫也

萬盈數也魏大名也 服曰數從一至萬爲滿魏喻巍巍高大也

同上

案御覽七百五十引風俗通十千謂之萬正義曰數從一至萬每十則改名至萬以後稱一萬十萬百萬千萬萬萬始名億從

是以往皆以萬爲極是至萬則數滿也魏世家萬滿數也是盈
爲滿也淮南俶眞注巍巍高大故曰魏闕孟子音義下引丁音
魏魏當作巍巍是巍巍義同也顧氏南原云說文巍从鬼委聲
巍高之巍卽巍國之巍今巍國字省作魏按魯峻碑陰巍郡衡
方碑恢巍絳之和戎韓敕兩側題名巍令楊著碑陰巍郡陳球
後碑巍郡武梁祠堂畫象象巍湯君石門頌南鄭巍整華山亭
碑戶曹掾巍嘗威魏皆作巍或作魏服以巍巍釋音義相兼也
緯書當塗高指魏三國志杜瓊傳魏者大也是兼高大言之
以是始賞天啟之矣 賈曰以魏賞畢萬是謂天開其福

同上

案說文賞賜有功也禮記月令注賞謂有功德者有以顯賜之

也釋名釋姿容廣雅釋詁並云啟開也襄十八年傳善人富謂之賞郊特牲富也者福也畢萬受此顯賜是天開其福矣

筮仕于晉 服曰畢萬在周筮仕于晉

本疏

遇屯之比 賈曰震下坎上屯坤下坎上比屯初九變之比

晉世家注

辛廖 賈曰辛廖晉大夫

同上

年經吉禘于莊公 賈曰禘者遞也審遞

惠校本作諦

昭穆遷主遞位

孫居王父之位

禮記王制疏

案禘之言遞以音義兼釋也爾雅釋言遞迭也說文遞更易也

廣雅釋詁遞代也審遞昭穆者言審視而更易之也禮記王制天子七廟三昭三穆與太祖之廟而七諸侯五廟二昭二穆與

太祖之廟而五周禮小宗伯注自始祖之後父曰昭子曰穆遷主遞位者杜注云三年喪畢致新死者之主於廟廟之遠主當遷入祧孫居王父之位者爾雅釋親父之考爲王父如王父昭則孫亦昭位王父穆則孫亦穆位

九月夫人姜氏孫于邾 賈服曰文姜殺夫罪重故去姜氏哀姜殺子罪輕故不去姜氏

本疏

案莊元年夫人孫于齊傳曰絕不爲親以文姜與弑桓公故舍族以絕之明其罪重也慶父通哀姜而子般見殺是哀姜有殺子之罪然輕於文姜故不去氏

傳號公敗犬戎于涓隊

服曰隊謂汭也

水經渭水注

案今本作汭與服異服以隊汭音義相同故舉以釋也穆天子傳于是得絕鉞山之隊注隊謂谷中險阻道也谷中之險阻爲隊崖岸之隈曲亦爲隊義互證也說文汭水相入也書召誥攻位于洛汭鄭注隈曲中也爾雅釋邱隩隈說文隈水曲隩也淮南原道以曲隈深潭相予高注曲隈崖岸委曲

初公傅奪卜薊田公不禁

賈曰卜薊魯大夫

魯世家注

服曰公卽位

時年九歲

本疏

使卜薊賊公于武闕

賈曰宮中之門謂之闕

魯世家注

案此爾雅釋宮文郭注謂相通小門也說文闕宮中門考工記匠人闕門容小扁參个鄭注小扁長二尺參个六尺

閒于兩社 賈曰兩社周社亳社也兩社之閒朝廷執政之臣所

在上同

案白虎通社稷篇人非土不立故封土立社示有土也又云春秋傳曰天子有大社焉東方青色南方赤色西方白色北方黑色上冒以黃土故將封東方諸侯取青土苴以白茅包土者使立國社魯爲周王所封故國社謂之周社亳社則哀四年亳社災穀梁傳曰亳社者亳之社也亳亡國也亡國之社以爲廟屏戒也注立亳之社於廟之外是魯有亳社矣周禮小宗伯掌建國之神位右社稷左宗廟注庫門內雉門外之左右司土職注此王日視朝事於路門外之位太宰職注治朝在路門外大僕

職注燕朝朝於路寢之庭朝士職注外朝在庫門之外又云周天子諸侯皆有三朝外朝一內朝二內朝之在路門內者或謂之燕朝若然則魯之外朝在庫門之外治朝內朝則與王所在同宗廟社稷旣在雉門之外雉門外無朝不得云執政所在矣定二年雉門及兩觀災則兩觀當在雉門之側禮記禮運昔者仲尼與於蜡賓出遊於觀之上蜡祭在廟云出遊於觀之上可證魯之宗廟宜在雉門內周禮注云在雉門外者指王之宗廟言之右社稷左宗廟亳社爲廟屏是亳社在左周社在右玉藻諸侯朝服以日視朝於內朝注此內朝路寢門外之正朝也卽周禮所謂治朝是也江氏永曰治朝外朝皆是平地無堂階故

謂之朝廷者平地也服云朝廷執政之臣所在專指治朝不兼外朝言所謂閒于兩社也爾雅釋宮中庭之左右謂之位注羣臣之列位也雖分左右總在兩社之間傳所謂有位干朝是也

季氏亡則魯不昌 服曰謂季友出奔魯弑二君

本疏

案二君謂子般閔公也子般未成君而稱君者統辭也

鶴有乘軒者 服曰車有藩曰軒

同上

案說文軒曲輶藩車也文選東京賦薛注屬車有藩者曰軒周禮巾車注藩今時小車藩漆席以爲之亦作輶漢書景紀朱兩輶應劭曰車耳反出所以爲之藩屏翳塵泥也以簞爲之或用

革續漢書輿服志注車有輶者謂之軒羽獵賦注引韋昭車有輶曰軒廣雅釋器輶箱也亦作蕃續漢書輿服志引通俗文車箱爲蕃太元積次四君子積善至於車耳測曰君子積善至于蕃也嚴舉碑位至蕃車是也

齊人使昭伯烝于宣姜 服曰昭伯衛宣公之長庶伋之兄宣姜

宣公夫人惠公之母

詩牆有茨疏

歸夫人魚軒

服曰魚獸名

詩采芣疏

案詩采芣疏引陸璣義疏云魚獸似豬東海有之其皮背上斑文腹下純青今以爲弓韉步叉者也彼詩曰象弭魚服此曰魚軒然則可以飾器惟此魚獸耳

重錦三十兩

服曰重牢也

本疏

案廣雅釋詁牢堅也爾雅釋詁堅固也郭注堅然牢固蓋重則

牢固矣服故以牢釋重也

伐東山皋落氏

賈云東山赤狄別種

晉世家注

服云皋落氏赤翟之

都也

水經河水注四

里克 賈曰里克晉卿里季也

晉世家注

案國語晉語韋昭注里克晉大夫里季也與賈同蓋季爲克之

字也

以朝夕視君膳者也

服曰厨膳飲食

同上

案一切經音義十五引蒼頡篇厨主食者也周禮序官膳夫注

膳之言善也又膳夫職注食飯也飲酒漿也厨卽彼職所云徹於造者也

有守則從從曰撫軍 服曰有代太子守則從之助君撫循軍士

同上

案禮記文王世子公若有出疆之政庶子以公族之無事者守於公宮諸父守貴宮貴室諸子諸孫守下宮下室卽所云代太子守者也

君與國政之所圖也 賈曰國政正卿也

同上

君其舍之 服曰舍之置申生勿使將兵也

御覽一百四十六

不對 服曰里克不對

同上

教之以軍旅

賈曰將下軍

晉世家注

無懼弗得立

服曰不得立已也

同上

公衣之偏衣

服曰偏褻之衣偏異色駁不純褻在中左右異故

曰偏衣

同上

案國語晉語衣之偏褻之衣韋昭注褻在中左右異故曰偏韋多本賈注則服賈同也一切經音義十七引蒼頡篇駁不純色也說文駁馬色不純漢書梅福傳白黑雜合謂之駁一切經音義十七又引通俗文黃白雜謂之駁褻說文新衣聲一曰背縫史記趙世家王夢衣偏褻之衣正義亦曰衣背縫也是衣蓋以背縫分而左右各自爲色也

佩之金玦 服曰以金爲玦也

同上

案國語晉語注玦如環而缺漢書五行志注後漢書馮魴傳注並云半環曰玦玦以玉爲之故字從玉說文玉佩也楚辭九歌注同今乃以金爲之

狂夫阻之 服曰阻止也方相之士蒙元衣朱裳主索室中毆疫號之爲狂夫止此服言君與太子以狂夫所止之服衣之

本疏

案國語晉語且是衣也狂夫阻之衣也是明言狂夫所服者如杜以狂夫猶知有疑爲解則晉語所言爲不辭矣韋昭注云狂夫方相氏之士也阻古詛字將服是衣必先詛之周禮方相氏黃金四目元衣朱裳執戈揚盾以毆疫也韋以阻爲詛服以阻

爲止釋阻字雖不同而以狂夫爲方相則韋服同也當是相傳之古義如是方相氏見周禮司馬篇後鄭注云以驚毆疫癘之鬼如今魃頭也時難四時作方相氏以難卻凶惡也

與其危身以速罪也 服曰速召也疾也言太子不去身必危疾

召罪狐突知其亂本既成而太子拘於一節不達至孝之義與皋

落雖戰勝而歸猶不能免於難而使父有忤或殺子之罪故傳備

眾賢之言以迹太子所以死也

御覽百四十六○恭寬謹案洪本此下云經在僖公五年晉侯殺其

太子申生此亦似非服義

聞成季之繇

服曰繇抽也抽出吉凶也

周易釋文

案儀禮少牢饋食禮注吉凶之占繇釋文繇卦兆辭繇抽聲相

近說文抽引也或从由莊子天地釋文引李注亦曰抽引禮記
月令審卦吉凶繇辭所以引其緒也

衛文公大布之衣

服曰戴公卒在於此年

詩定之方中疏

案詩定之方中序箋云戴公立一年而卒史記衛世家戴公元
年卒復立其弟文公詩疏云狄以十二月入衛懿公死其月戴
公立而卒又文公立則戴公立未踰月卽卒故服云卒在此年

春秋左氏傳賈服註輯述卷六

嘉興李貽德學

僖公

元年經夫人氏之喪至自齊 賈曰殺子輕故但貶姜本

案穀梁傳曰其不言姜以其殺二子貶之也賈蓋本此言殺子
罪輕故但貶姜援文姜去姜氏以明之也

傳公敗邾師于偃虛邛之戍將歸者也 服曰虛邛魯邑魯有亂

邾使兵戍虛邛魯與邾無怨因兵將還要而敗之所以惡僖公也

本疏

案說文云戍守邊也詩采芣序遣戍役也箋云戍守也子般之

弑成季以僖公適邾邾人因爲魯戍虛邛以爲之援及公位已定故戍卒將還要者荀子儒效注云邀也漢書趙充國傳注云遮也言公邀遮而敗之也杜云邾人因戍虛邛欲以侵魯傳無明文不如服釋傳意之爲得也

公賜季友汶陽之田及費 賈曰汶陽鄆魯二邑

魯世家注

案汶陽在汶水之陽水經汶水篇注汶水西逕汶陽故城北而西注卽此汶陽也漢書地理志魯國汶陽師古曰卽左傳所云公賜季友汶陽之田者也又東海郡費班氏自注云故魯季氏邑沂水篇注云治水又東南流逕費縣故城南爲魯季孫之邑

年二經城楚邛

賈曰楚邛衛地

史記索隱十

案僖二年傳諸侯城楚邛而封衛焉十二年傳諸侯城衛楚邛之郭是楚邛爲衛地也漢書地理志山陽郡成武自注云有楚邛亭

滅夏陽

服曰夏陽號邑也在大陽東三十里城南

水經河水注四○戴校以

城南爲衍文

案左氏作下陽公羊作夏陽服本同公羊漢書地理志宏農郡陝自注云故號國北號在大陽服所本也

江人黃人

賈曰江黃稱人刺不度德善鄰恃齊背楚終爲楚所

滅

本疏

案水經淮水篇淮水又東逕安陽縣故城南江國也今其地有

江亭又云柴水又東逕黃城西當卽此經之黃也其地皆與楚鄰不度德善鄰並傳文也說文云恃賴也楚辭惜誦注背違也言江黃於齊之遠賴之於楚之近違之後遂爲楚滅十二年滅黃文四年滅江卽其事也

傳請以屈產之乘

服曰產生也

公羊本年疏

案周禮大宗伯以天產作陰德注天產者動物謂六牲之屬是馬可名產孟子趙注亦云產生也

假道于虞以伐虢

賈曰虞在晉南虢在虞南

晉世家注

案漢書地理志河東郡大陽自注云吳山在西上有吳城周武王封太伯後於此是爲虞公又絳注云晉武公自曲沃徙此又

宏農郡陝注云故虢國有焦城北虢在大陽

冀爲不道入自顛軫伐鄆三門服曰冀伐晉也本疏

案說文鄆晉邑春秋傳曰伐鄆三門是服許同義

冀之既病則亦惟君故服曰虞助晉也將欲假道稱前恩以誘

之太疏

三傳蕩公賈曰蕩搖也齊世家注

案禮記樂記注蕩猶動也廣雅釋詁搖動也是搖卽蕩也

四經蔡漬服曰民逃其上曰漬也同上

案見文三年傳

許男新城卒賈曰不言于師善會主加禮若卒於國本疏

案成十三年曹伯廬卒于師今許男卒于師而不言者蓋以善會主之能加禮也會主斥齊桓加禮卽傳云葬之以侯禮也云若卒於國者穀梁傳曰諸侯死于國不地死於外地死於師何爲不地內桓師也彼注云齊桓威德洽著諸侯安之雖卒於外與其在國同

楚屈完來盟于師

服曰言來者外楚也

本疏

案隱元年天王使宰咺來歸惠公仲子之賵杜曰來者自外之文穀梁傳曰來者何內桓師也內桓師則外楚矣服故云然也

傳

唯是風馬牛不相及也

賈服曰風放也牝牡相誘謂之風

賈義

見書費誓疏○

服義見本疏

案書費誓馬牛其風史記集解引鄭注云風走逸孟子云如追放豚則放亦走逸之謂說文云牡畜父牝畜母廣雅釋獸牡雄也牝雌也誘者禮記樂記注云引也牝牡相誘者言雌雄相引而放逸也二十八年傳晉中軍風于澤杜云牛馬因風而走皆失之是也

昔召康公 服曰召公奭

齊世家注

案說文以奭爲召公名史記燕世家云召公奭與周同姓白虎通王者不臣篇召公文王子也詩甘棠疏引皇甫謐云文王庶子孫先生尙書今古文疏云傳載文王之子無名奭者史記集解引譙周曰周之支族食邑於召與史記同姓之說合

五侯九伯

賈服曰五等諸侯九州之伯

周官大宗伯疏○詩旄
耶疏引服云五侯公侯

伯子男九伯

九州之長

案禮記王制云王者之制祿爵公侯伯子男凡五等既各有主
名矣而統謂之侯者隱七年傳疏云諸侯者公侯伯子男之總
號周之九州據職方氏爲雍冀幽并青揚豫荆兗是也曲禮九
州之長入天子之國曰牧注云每一州之中天子選諸侯之賢
者以爲之牧也若然則九伯當稱九牧而此言伯者周禮大宗
伯八命作牧注云謂侯伯有功德者加命疏云牧用侯伯不定
若有賢侯則用侯若無賢侯則用伯可也王制二百一十國以
爲州州有伯注云凡長皆因賢侯爲之殷之州長曰伯虞夏及

周皆曰牧是伯卽牧也白虎通封公侯篇州伯何謂也伯長也
選擇賢良使長一州故謂之伯詩旄邛疏引張逸受春秋異讀
鄭云五侯侯爲州牧也九伯伯爲州伯也是鄭氏以牧屬侯與
賈服說異

女賁征之 服曰太公爲王官之伯掌司馬職以九伐之法征討
邦國故得征之

詩旄
邛疏

案禮記檀弓注云齊太公受封留爲太師是爲王官之伯矣旣
爲太師而曰掌司馬職者詩淇澳疏引書顧命鄭注云公兼官
以六卿爲正次鄭志答趙商問謂三公兼師保則得師保之稱
是三公之有師保有其人則設其實以六卿爲實職白虎通封

公侯篇云王者所以立三公何司馬主兵司徒主人司空主地
以見三公有實職也然則太公雖官爲太師而其職則司馬也
知者大明詩云維師尙父時維鷹揚變伐大商史記齊世家述
太公師尙父左仗黃鉞右把白旄以誓號曰蒼兕蒼兕總爾眾
庶與爾舟楫後至者斬樂記云發揚蹈厲太公之志也是周之
興也太公實掌兵政掌兵政則司馬職也九伐之法者周禮大
司馬以九伐之灋正邦國注云諸侯之于國如樹木之有根本
是以言伐云其法則曰眚曰伐曰壇曰削曰侵曰正曰殘曰杜
曰滅是也

東至于海西至于河南至于穆陵北至于無棣 服曰是皆太公

始受封土地疆境所至也

齊世家注

案史記齊世家云於是武王已平商而王天下封師尚父於齊營邱是太公始封卽在平商之後矣正義曰中候云齊桓霸邊八流以自廣計桓公之時齊之西竟當在九河之最西徒駭蓋是齊之西界其東至海當盡樂安北海之東界也穆陵無棣春秋土地名並闕集解云皆齊境也周禮序官掌疆注云疆界也詩召旻箋國中至邊竟釋文云竟本亦作境是疆境所至言至四邊之界也

爾貢包茅不入

賈曰包茅菁茅包匭之也以供祭祀

同上

案書禹貢包匭菁茅史記集解引鄭注云菁茅茅有毛刺者管

子輕重丁篇江淮之間一茆三脊名曰菁茅鄭注又云甌纏結也給宗廟縮酒重之故包裹又纏結也劉逵注吳都賦亦云既包裹而又纏結之賈云包甌之者亦言包之而又甌之也周禮甸師祭祀其蕭茅注鄭大夫云蕭字或爲蒿蒿讀爲縮束茅立之祭前沃酒其上酒滲下去若神飲之故謂之縮縮浚也元謂茅以其祭之其亦以縮酒其以藉祭縮酒沛酒也醴齊縮酌說文云舊禮祭束茅加於裸圭而灌鬯酒是爲蒿象神飲之也卽引此傳文是茅爲供祭祀之用故下文云王祭不供也

昭王南征而不復 服曰周昭王南巡狩涉漢未濟船解而溺昭王王室諱之不以赴諸侯不知其故故桓公以爲辭責問楚也

同上

案呂覽音初云周昭王親將征荆還反涉漢梁敗王抔於漢中
是呂覽云梁敗也服云船解者本疏及穀梁疏云舊說皆言漢
濱之人以膠膠船故得水而壞昭王溺焉與呂覽異所謂傳聞
異辭也王室諱之不以赴諸侯不知者史記周本紀云昭王南
巡狩不返卒於江上其卒不赴告諱之也

方城以爲城漢水以爲池

服曰方城山在漢南

同上○詩疏引作方城山也

漢水名皆楚之隘塞耳

詩殷武疏

案水經灊水篇注引郡國志葉縣有方城郭仲產曰苦菜于東
之閒有小城名方城尋此城致號之由當因山以表名也盛宏
之曰葉東界有故城始隼縣東至瀕水達比陽界南北聯聯數

百里號爲方城一謂之長城云北面雖無基築皆連山相接而漢水流其南是方城在漢南也史記集解引韋昭曰方城楚北之阨塞阨卽隘也

死王事

賈曰謂朝天子以命用師

御覽五百五十三

案周禮大宗伯時見曰會注時見者言無常期諸侯有不順服者王將有征討之事則旣朝覲王爲壇於國外合諸侯而命事焉賈約此義以釋王事也

於是有以袞斂

賈曰袞斂上公九命服袞也

同上

案禮記王制曰制三公一命卷若有加則賜也注云卷俗讀也其通則曰袞三公八命矣復加一命則服龍袞周禮曰諸公之

服自衮冕而下則如王之服疏三公八命身著鷩冕若加一命則爲上公而著衮冕是上公九命始得衮冕也鄭注覲禮云上公衮無升龍說文衮幅一龍蟠阿上嚮謂之升龍惟天子有之故白虎通引傳云天子升龍諸侯降龍見覲禮疏許穆公死王事故加二等而得公服斂也許男爵加二等僅得視伯而此得從公服者白虎通爵篇言殷爵三等謂公侯伯也所以合子男從伯者何王者受命改文從質無虛退人之義故上就伯也是公爲一等侯爲一等伯子男爲一等也

太子祭于曲沃

服曰齊姜廟所在

晉世家注

案晉語夫曲沃君之宗也韋注宗本宗也曲沃桓叔之封先公

宗廟在焉又烝於武公韋昭注云廟在曲沃春秋釋例內女夫人卒葬例云卒哭而祔於祖姑故齊姜之廟在曲沃也

年五傳公既視朔遂登觀臺服曰人君入太廟視朔合朔天子曰

靈臺諸侯曰觀臺禮記玉藻疏通典四十四賈服曰靈臺在太廟明堂之中

詩靈臺疏玉藻疏通典四十四引服曰在明堂之中中文承天子曰靈臺諸侯曰觀臺之下辭意不明賈服皆以

廟學明堂爲一詩靈臺疏文二年疏賈服皆以祖廟與明堂爲一

案玉藻天子聽朔於南門之外諸侯皮弁聽朔於太廟聽朔卽視朔五經異義諸侯歲遣大臣之京師受十二月之正還藏於太廟中月旦朝廟存神有司因告曰今月當行某政是視朔告朔之禮必於太廟行之云人君者統天子諸侯言異義又引左

氏說天子靈臺在太廟之中諸侯有觀臺亦在廟中是靈臺觀
臺以天子諸侯異名服亦與許同也詩靈臺疏引盧植禮記注
曰明堂卽太廟也天子太廟上可以望氣故謂之靈臺中可以
敘昭穆故謂之太廟圓之以水似璧故謂之辟雍又引穎容春
秋注行禘祫敘昭穆謂之太廟告朔行政謂之明堂占雲物望
氛祥謂之靈臺其四門之學謂之太學淮南本經訓高誘注告
朔朝歷頒宣其令謂之明堂其中可以敘昭穆謂之太廟其上
可以察氛祥望雲氣謂之靈臺諸說皆以廟學明堂爲一而靈
臺卽在太廟明堂中也

狐裘蒙茸

服曰蒙茸以言亂貌

晉世家注

案今本作虺茸詩下國駿虺荀子榮辱篇引作駿蒙虺同虺得通蒙也詩旄邱狐裘蒙戎傳云蒙戎以言亂也蒙茸與蒙戎同故服據毛傳以釋

一國三公吾誰適從 服曰三公言君與二公子將敵故不知所

從

同上

披斬其祛 服曰祛袂也

同上

案說文云祛衣袂也詩遵大路羔裘傳並同然有析言之者儀禮喪服注祛袖口也檀弓注祛謂衰緣袂口也玉藻注祛口也喪服云袂屬幅祛尺二寸幅謂衣之身也深衣云袂之長短反詘之及肘是屬於幅長於手反詘至肘皆袂也其袂近口又別

名爲袞故鄭每析言之也正義曰袞是總名得以袞表袞故云
袞袞說文云袞褻也

會王太子鄭 賈曰惠王以惠后故將廢太子鄭而立王子帶故
齊桓帥諸侯會王太子以定其位

御覽一百四十六

案杜注全同正義曰二十四年傳曰不穀不德得罪于母氏之
寵子帶書曰天王出居于鄭辟母弟之難也如彼傳文則襄王
與子帶俱是惠后所生但其母鍾愛其少子故欲廢太子而立
之周本紀云襄王母早死後母曰惠后生叔帶與傳不同史記
謬也七年惠王崩襄王畏子帶不敢發喪知此時有廢太子之
意故齊桓帥諸侯會太子定其位安王國也

輔車相依 服曰輔上領車也與牙相依

詩碩人疏

案易艮上六艮其輔虞翻作輔是輔本作輔說文云輔頰也玉篇引傳作輔車相依楚辭大招鑿輔奇牙王逸注云言美人頰有鑿輔口有奇牙淮南說林訓奇牙出鑿輔搖高誘注云鑿輔頰邊文婦人之媚也又曰鑿輔在頰則好詩碩人傳云倩好口輔也說文云頰面旁也鑿輔在頰卽俗所謂笑靨此皆自外言之至服所云上領車則謂上下持牙之骨釋名釋形體所云頤或曰輔車或曰牙車或曰領車或曰頰車或曰顰車咸卦咸其輔頰舌虞注亦曰上頰車凡此皆自內言之段氏曰服注左傳謂之上領車然則在下持牙者亦得曰下領車矣必云上領車

者言酺則言上是也楚辭怨世余生終而無所依王逸注依保也言與牙相保也

號仲號叔 賈曰號仲封東號制是也號叔封西號號公是也本疏

案晉語文王敬友二號韋昭注云二號文王弟號仲號叔也又鄭語言濟洛河潁之間號鄩爲大注云號東號號仲之後史記鄭世家集解引虞翻曰號姬姓東號也漢書地理志注引臣瓚曰初桓公寄孥與賄於號會之間幽王既敗二年而滅會四年而滅號鄭世家集解引徐廣曰號在成臯地理志河南郡成臯注云故虎牢或曰制隱元年傳云制巖邑也號叔死焉蓋卽東號封地鄭語西有虞號注云號號叔之後西號也地理志宏農

郡陝注云故虢國此卽所謂西虢虢公指虢公醜正義謂賈氏東虢西虢之言亦以意解不可審知按國語旣指虢叔之封曰西有虞虢是當時自指虢仲之封爲東虢矣隱元年傳杜解亦曰虢叔東虢君也正義曰言所滅之君字叔也案傳燕國有二則一稱北燕邾國有二則一稱小邾此虢國有二而經傳不言東西者於時東虢已滅故西虢不稱西其並存之日亦應以東西別之是疏於杜義亦以東西之稱爲然也

甚愛之也

服曰愛之甚

本疏

案甚本今作其正義曰愛之謂愛虞也服虔作甚當謂愛桓莊之族甚也愛之若甚何以誅之且文勢不順又改字失真繆之

甚也案愛之自當主桓莊言之是釋上文親字言理當甚愛之也而尙以寵偏害之況虞本非所愛乎所以警虞公者甚至若正義謂愛爲愛虞真是文勢不順矣其甚二字經典往往相亂此語杜氏無解則甚之爲其或亂於六朝本乎

民不易物惟德繫物 服曰繫發聲也言黍稷牲玉不易無德薦

之則不見享有德則言饗言物爲有德用也

詩洞酌疏

案發聲者凡聲之發有舒有閒所謂語助辭也周禮甸師注齎盛祭祀所用穀也小宗伯六齎注六齎謂六穀黍稷稻粱麥苽是六穀皆爲祭祀之用而獨舉黍稷者禮記月令注以稷爲首種管子輕重篇以黍爲穀之美者故楚茨詩曰我黍與與我稷

翼翼舉黍稷足以包餘穀矣祭義云古者天子諸侯必有養獸之官王制云賜圭瓚然後爲鬯小宗伯注天子圭瓚諸侯璋璜考工記玉人大璋中璋邊璋注於大山川則用大璋於中山川用中璋於小山川用邊璋是牲玉皆以祭祀者也其物有常制未嘗改易而饗與不饗則係於德之有無也

衾服振振

賈曰衾同也

周禮司

服曰衾服黑服也

文選閒居賦注

案衾今本作均說文衾讀若均是均以聲同相段其本字當作衾也呂覽悔過今衾服回建注衾同也兵服上下無別故曰衾服淮南齊俗尸祝衾衽注云衾純也純亦同也服云黑服者說文云衾元服也漢書五行志引傳衾服振振注云謂黑衣續漢

與服志注引吳都賦注云衿阜服也與說文元服訓同竊謂兵服上下皆黑衣故曰衿服賈服各舉一義其實互相成也

而修虞祀

服曰虞所祭祀命祀也

晉世家注

案命祀也者周禮大宗伯乃頒祀於邦國注頒讀爲班班其所當祀及其禮大祝建邦國禁督逆祀命者注督正也正王之所命諸侯之所祀有逆者則刑罰焉是諸侯祀典皆受之王朝故曰命祀今虞滅而仍修其舊班之祀典焉

六年

傳使賈華伐屈

賈曰賈華晉右行大夫

同上

案十年傳右行賈華是華爲右行大夫也

七年

傳子華由是得罪于鄭

服曰鄭伯罪之也

御覽一百四十六

年八傳不薨于寢 服曰寢謂小寢 禮記檀弓疏

案爾雅釋宮云無東西廂有室曰寢公羊莊三十二年公薨于路寢注天子諸侯皆有三寢一曰高寢二曰路寢三曰小寢其實天子六寢周禮宮人掌王之六寢之脩注謂路寢一小寢五是也禮記玉藻退適路寢又云大夫退然後適小寢釋服注小寢燕寢也路寢與小寢各別喪大記云君夫人卒於路寢是夫人所卒之地亦名路寢也正義曰言夫人卒於路寢謂卒於夫人之大寢對君路寢爲小故云小寢也

不殯于廟 服曰廟謂殯宮鬼神所在謂之廟 同上

案禮記檀弓云殷朝而殯於祖周朝而遂葬則周制不殯於廟

而此云不殯於廟則弗致似正禮當殯於廟者鄭氏以爲春秋
變周之文從殷之質故殯於廟服氏不從者以春秋從時王之
制不得用公羊說知殯宮亦可稱廟者儀禮士喪禮云巫止於
廟門外其時尸在適寢也士虞禮云側亨於廟門之右東面其
時亦迎魂反神在寢也非廟而皆稱廟鄭注士喪禮云凡宮有
鬼神曰廟注士虞禮云鬼神所在則曰廟一切經音義十四引
韓詩亦云鬼神所居曰廟是古說如是其實春秋時變禮不必
如檀弓所云傳稱晉文公卒將殯于曲沃周禮喪祝注云晉宗
廟在曲沃是實殯於廟矣鄭君謂從殷之質其說亦確

九傳

以伯舅耄老

服曰七十曰耄

詩車鄰疏。禮記射義疏。

案禮記曲禮七十曰老八十九十曰旄釋文云本或作八十曰
耄九十曰旄後人妄加之邵氏爾雅正義曰按禮記古本云八
十曰耄今本脫曰耄二字毛傳說文俱用禮記古本蒙謂易釋
文引馬融注云七十曰耄公羊宣十二年傳注則曰六十稱耄
爾雅釋言舍人注亦曰耄年六十稱也毛許及王肅易注則曰
八十射義疏引鄭易注則曰年踰七十使古本果有曰耄二字
諸家所稱不應參差若此是耄爲耆老概稱自六十至八十並
得稱也服云七十曰耄者正義曰曲禮云七十曰老爾雅以耄
爲老故以爲七十蓋杜亦從服說也

里克平鄭欲納文公故以三公子之徒作亂 賈曰平鄭晉大夫

三公子申生重耳夷吾也

晉世家注

案晉語驪姬曰吾欲作大事而難三公子之徒又里克將殺奚齊先告荀息曰三公子之徒將殺孺子韋昭注徒黨也

及高粱而還

服曰高粱晉地也

同上

案續漢郡國志河東郡楊有高粱亭劉昭注引地道記云有梁城去縣五十里叔嚮邑也

公謂公孫枝

服曰秦大夫公孫子桑

秦本紀注

案左傳子桑之忠也其知人也能舉善也又貽厥孫謀以燕翼子子桑有焉子桑即公孫枝論語子桑伯子鄭亦以為秦大夫

下傳周公忌父

賈曰周卿士

晉世家注

狐突適下國 服曰晉所滅國以為下邑

同上

案耿霍楊魏虞虢皆晉所滅之國此下國未審其地以為下邑者廣雅釋詁云邑國也是下國猶下邑也地已滅而猶稱國者猶禮所謂因國也

夷吾無禮 賈曰烝於獻公夫人賈君故曰無禮

本疏

案莊二十八年傳曰晉獻公娶于賈是正妃故稱君詩鶉奔我以爲君傳曰君國小君疏云夫人對君稱小君以夫妻一體言之亦得曰君襄九年左傳筮穆姜曰君必速出是也十五年傳曰晉侯之入也秦穆姬屬賈君焉晉侯烝于賈君服氏曰上淫曰烝禮記曲禮曰夫禮所以別上下也今惠公爲鶉鵲之行故

曰無禮正義引馬融說申生不自明而死夷吾改葬之章父之過故曰無禮亦足補賈義也

余得請于帝矣

服曰帝天帝請罰有罪

晉世家注

案周禮大宗伯以禋祀祀昊天上帝注昊天上帝冬至於圜丘所祀天皇大帝書舜典肆類於上帝馬注上帝太乙神君爽格於上帝鄭注上帝太微中其所統也公羊宣三年傳帝牲不吉注帝皇天大帝在北辰之中主總領天地五帝羣神也卽此天帝也請罰有罪者禮記王制郵罰麗於事疏罰謂責罰其身廣雅釋詁云罰伐也古者天人相通命德討罪赫聲濯靈詩皇矣云旣受帝祉元鳥云帝立子生商文王世子云夢帝與我九齡

洪範云帝乃震怒晉語云帝命曰使晉襲於爾門呂覽音初云
帝令燕往視之無不福善禍淫呼吸相感故在上者亦無不承
奉天憲子惠黎元後世不畏天命於是明赫之象委之虛冥板
蕩之篇無足警惕褻天輕命端基此矣

弊于韓

賈曰弊敗也韓晉韓原

同上

案說文云弊頓仆也與敗義近韓晉韓原者十五年傳戰于韓
故指韓爲韓原也顧氏炎武曰三敗及韓在涉河之後此韓在
河東故曰寇深矣括地志韓原在同州韓城縣西南非也杜氏
解但云晉地

及七輿大夫

服曰上軍之輿帥七人屬申生者

本疏

案詩語子帥七輿大夫以待我韋昭注云七輿申生下軍大夫也與服義同此作上軍者陳樹華云上當作下阮氏校勘記云按閔二年傳云公將上軍太子申生將下軍陳所訂是也正義曰襄二十三年下軍輿帥七人往前申生將上上當軍今七輿大夫爲申生報怨欒盈將下軍故七輿大夫與欒氏炫即劉謂炫服言是然則正義亦以杜氏侯伯七命副車七乘之說爲不然矣

十二年傳若節春秋 賈曰節時也

周本紀注

陪臣敢辭 服曰陪重也諸侯之臣於天子故曰陪臣

同上

案說文陪重土也禮記曲禮列國之大夫入天子之國曰某士

自稱曰陪臣某疏云其君已爲王臣已今又爲已君之臣故自稱對王曰重臣也

王曰舅氏 賈曰舅氏言伯舅之使也

同上

案禮記曲禮天子異姓謂之伯舅注親之之辭也疏云異姓謂之伯舅者異族重親之名也異族無父稱故呼爲伯舅亦親之故也

年三傳謂百里 服曰百里秦大夫

晉世家注

案百里當是百里奚三十二年傳疏據世族譜謂百里爲姓

白雍及絳 賈曰雍秦國都絳晉國都也

秦本紀注

案史記秦本紀云德公元年初居雍城詩秦風譜亦云秦仲元

孫德公又徙於雍疏云以德公之後常居雍故特言之史記集解引徐廣曰今縣在扶風顧氏炎武曰春秋時晉國本都翼在今之翼城縣及昭侯封文侯之弟桓叔於曲沃桓叔之孫武公滅翼而代爲晉侯都曲沃在今聞喜縣其子獻公城絳居之在今太平縣之南絳州之北今太平西南二十五里城址尙存釋名釋州國云國城曰都都者國君所居人所都會也

千四經沙鹿崩 服曰沙山名鹿山足林屬於山曰鹿疏本

案沙山名本穀梁傳文鹿山足者詩旱麓周語作旱鹿注山足曰鹿易屯卽鹿無虞釋文云王肅本作麓曰山足穀梁傳注引劉向說鹿在山下平地是鹿麓古通而訓爲山足也服云沙山

名鹿山足者言沙山之足也林屬於山曰鹿者亦穀梁傳文也
水經濁漳水注應劭曰鹿者林之大者也杜氏云沙鹿山名平
陽元城縣東有沙鹿土山正義曰漢書元后傳稱后祖翁孺自
東平陵徙魏郡元城委粟里元城建公曰昔春秋沙鹿崩晉史
卜之曰陰爲陽雄土火相乘故有沙鹿崩崩後六百四十五年
宜有聖女興今王翁孺徙正值其地日月當之元城郭東有五
鹿之虛卽沙鹿地計爾時去聖猶近所言當得其實故以沙鹿
爲山名依漢書爲義也愚按晉史之言於傳無徵元城建公所
云當由王氏之附會此與處者爲劉氏語本僞造班氏據之以
推漢系者同失之誣杜氏反取之爲無識矣

十五年 傳公曰不孫 服曰孫順也

晉世家注

案孫本作孫說文云孫順也通作遜又作孫詩文王有聲貽厥
孫謀儀禮聘禮辭無常孫而說禮記緇衣則民有孫心注皆以
孫爲順釋名釋言語順循也循其理也

步揚御戎家僕徒爲右 服曰二子晉大夫

同上

按程公說春秋分記引世族譜卻芮從子曰步揚揚生二子曰
雙曰蒲城是步揚爲卻雙之父

輅秦伯 服曰輅迎也

同上

案杜注及韋昭晉語注並同說文云輅車軫前橫木也段注婁
敬傳脫輓輅蘇林曰輅音凍洛之洛一木橫遮車前二人挽之

三人推之劉昭注輿服志曰韻集云輓前橫木曰輅按輓前當依許作輅前輓輅之車用人不用牛馬疑有輅無輓也禮經既夕篇賓奉幣由馬西當前輅注輅輅縛所以屬引疏曰謂以木縛車輅上以屬引於上而挽之若左傳梁由靡號射輅秦伯及狂狡輅鄭人皆謂車前相接可以禽之此輅引伸之義也

作爰田

服曰爰易也

本疏

案晉語云作輅田說文云爰籀文以爲車輅字漢書地理志秦孝公制輅田注引孟康曰爰輅同是輅田卽爰田晉語注或云輅車也以田出車賦此妄說也爰訓爲易者蓋爰輅皆假借字本當作趙說文云趙趙田易居也公羊宣十五年何注云司空

謹別田之高下善惡分爲三品上田一歲一墾中田二歲一墾
下田三歲一墾肥饒不得獨樂瘠塉不得獨苦故三年一換主
易居財均力平漢書食貨志曰民受田上田夫百畝中田夫二
百畝下田夫三百畝歲耕種者爲不易上田休一歲者爲一易
中田休二歲者爲再易下田三歲更耕自爰其處地理志注引
張晏曰周制三年一易以同美惡古者每歲易其所耕則田廬
皆易云三年者三年而上中下田皆徧三年後仍耕上田故曰
爰易也惠公之前古制已廢肥瘠不相換易今受賞之後民眾
大和復作爰田之制使三年一易財均力平不私其利欲以富
國也邠文作州兵亦復周制以強兵也

士剗羊 服曰離爲戈兵兌爲羊

本疏

案睽之上卦爲離離爲戈兵易說卦文虞翻曰乾爲金離火斷乾燥而鍊之故爲戈兵也歸妹士剗羊無血釋文引馬注云剗刺也廣雅釋言云剗剗也刺剗當用戈兵也歸妹之下卦爲兌兌爲羊亦說卦文周禮疏引鄭易注其畜好剛鹵易疏引王虞注羊者柔順之畜故爲羊也

西鄰責言不可償也 服曰三至五爲坎坎爲月月生西方故爲西鄰坎爲水兌爲澤澤聚水故坎責之澤澤償水則竭故責言不可償

本疏

案三至五爲坎者歸妹睽互體皆有坎也坎爲月易說卦文

選月賦注引鄭易注臣象也虞翻曰坤爲夜以坎陽光坤故爲月也禮記祭義云月生於西故曰生西方也坎爲水說卦文宋衷云坎陽在中內光明有似於水兌爲澤亦說卦文宋衷云陰在上令下溼故爲澤也澤聚水者周禮地官序官注澤水所鍾鍾亦聚也坎責之澤者兌爲澤虞翻曰坎水半見故爲澤兌澤既託於坎水故坎可責之澤澤償水則竭者兌上坎下其卦爲困其象曰澤無水困是償之則困矣故曰不可償

猶無相也

服曰兌爲金離爲火金火相遇而相害故無助也

本疏

案易說卦兌正秋也禮記鄉飲酒禮西方者秋白虎通五行篇金在西方是兌爲金也離爲火說卦文崔憬曰取卦陽在外象

月言事卷之二
三
火之外照也金火相遇而相害者五行篇又云五行所以相害者天地之性精勝堅故火勝金兌離相遇是火害金也故無助相訓助者詩生民有相之道傳云相助也

爲嬴敗姬 服曰離爲日爲火秦嬴姓水位三至五有坎象水勝

火故爲嬴敗姬

本疏

案離爲日爲火易說卦文荀爽曰陽外光也秦嬴姓水位者史記秦本紀舜賜姓嬴氏又始皇帝本紀始皇推終始五德之傳以爲周得火德秦代周德從所不勝方今水德之始是秦嬴爲水姬爲火以下卦離互體坎證之火本不勝水故爲嬴敗姬也車說其輶火焚其旗不利行師敗于宗耶 服曰五至三有坎爲

水象震爲車車得水而脫其輹也震爲龍龍爲諸侯旗離之震故
火焚其旗也震東方木兌西方金木遇金必敗韓有先君之宗廟
故曰宗邛本疏

案歸妹上卦爲震震爲雷詩采芑云戎車嘽嘽如霆如雷故震
亦爲車說文云輹車軸縛也易大畜輿脫輹子夏傳曰輹車下
伏兔也按說文云輹車伏兔考工記加軫與輹焉先鄭以輹爲
伏兔是伏兔名輹故廣雅釋器亦云輹伏兔也輹說文旣以爲
車軸縛廣雅釋詁云輹束也大畜釋文云輹車上縛也則非伏
兔明矣段氏曰謂以革若絲之類以固軸若然則水濡之當脫
矣震爲龍說卦文龍爲諸侯旗者周禮司常交龍爲旂又諸侯

建旂後鄭注諸侯畫交龍一象其升朝一象其下復也疏云象
升朝天子象下復還國也震爲諸侯之卦而有龍象故知爲諸
侯旗也儀禮覲禮疏引白虎通述禮記曰天子乘龍載大旂象
日月升龍傳曰天子升龍諸侯降龍是龍爲諸侯旗也離之震
者爾雅釋詁云之往也卦以往而變也蓋言睽之上卦離往變
歸妹之上卦震離爲火震爲龍旗是火焚其旗矣漢書魏相奏
曰東方之卦不可以治西方春興兌治則飢秋興震治則華蓋
以兌屬西方震屬東方故也白虎通五行篇云木在東方金在
西方故曰震東方木也兌西方金也五行篇又云剛勝柔故金
勝木是金 相遇必敗矣秦西方晉東方木不勝金故知晉敗

於秦也云韓有先君之宗廟故曰宗邛者傳曰凡邑有宗廟先君之主曰都晉語夫曲沃君之宗也注宗本宗也曲沃桓叔之封先君宗廟在焉猶西周謂之宗周也然則稱宗邛者知其以先君宗廟故也

寇張之弧 服曰坎爲寇爲弓故曰寇張之弧

本疏

案易說卦坎爲盜虞翻曰水行潛竊故爲盜也又爲弓輪虞翻曰可矯揉故爲弓輪坎爲月月在於庚爲弓繫辭云負且乘致寇至盜之招也是盜卽寇也又弦木爲弧虞翻曰坎爲弧故弧卽弓也

此一役也 服曰一役者韓戰之役

本疏

饋七牢焉

賈曰諸侯饗餼七牢牛一羊一豕一爲一牢也

秦本紀注

案儀禮聘禮歸雍餼注牲殺曰饗生日餼周禮大行人言諸侯禮七牢禮記禮運云諸侯七介七牢齊語環山於有牢注牢牛羊豕也周禮宰夫以牢禮之灋注三牲牛羊豕具爲一牢大行人注三牲備爲一牢又曰太牢公羊桓八年傳注牛羊豕凡三牲曰太牢羊豕凡二牲曰少牢

箕子曰

服曰紂庶兄

本疏

案論語微子注以箕子爲紂之諸父司馬彪注莊子大宗師曰箕子名胥餘正義曰宋世家云箕子者紂親戚也止云親戚不知爲父也兄也鄭元王肅皆以爲紂之諸父服杜以爲紂之庶

兄既無正文各以其意言耳

十六年傳六鷁退飛過宋都風也 賈曰風起於遠至宋都高而疾

故鷁逢風卻退

宋世家注

案抱朴子云風高者道遠爾雅釋天扶搖謂之猋注暴風從下上名義攷云暴風相扶而動搖奔疾若走犬然卽爾雅所謂颭也莊子逍遙篇云搏扶搖而上者九萬里淮南原道訓云扶搖抔抱羊角而上蓋風爲土氣始起於遠愈高則愈疾故顏師古漢書注云猋疾風也宋都者何休曰宋國所治也人所聚曰都鷁蓋過此而退飛也

齊有亂君將得諸侯而不終

賈曰石山岳之形

宋本作物

齊太岳之

允而五石隕宋象齊桓卒而五公子作亂宋將得諸侯而治五公子之亂鷁退不成之象後六年伯業退也鷁水鳥陽中之陰象君臣之訟閼也

穀梁疏

案賈氏說本劉歆漢書五行志於此傳引歆說云石山物齊太嶽後五石象齊威卒而五公子作亂庶民惟星隕於宋象宋襄將得諸侯之眾而治五公子之亂星隕而鷁退飛故爲得諸侯而不終六鷁象侯六年伯業始退執於孟也師古曰齊姜姓也其先爲堯之四嶽四嶽分掌四方諸侯五公子謂無虧也元也昭也潘也商人也賈以嶽爲岳者說文嶽古文爲岳尙書咨四岳蓋古文也莊二十二年傳姜太嶽之後也周語言堯命禹治

水其工之從孫四岳佐之胙四岳國命爲侯伯賜姓曰姜氏曰有呂石爲山物故其徵在太嶽之後齊桓公卒在十七年十八年齊立孝公宋與四公子之徒戰于廩故曰治五公子之亂也鷁退不成之象者穀梁疏引鄭君云六鷁俱飛得諸侯之象也其退示其德行不進以致敗也由此而宋稱霸至二十二年敗泓而霸業退距此適六年也鷁水鳥者鷁說文作鷁釋文云水鳥文選上林賦浮文鷁注亦云水鳥正義引洪範五行傳曰鷁者陽禽白虎通五行篇云水者盛陰者也鷁以陽禽而在水是陽中之陰象君臣之訟鬭也者韓康伯易繫辭注陽君道也陰臣道也鬭說文云从鬥兒兒善訟者也蓋謂戰泓之時大司馬

固諫而不聽也

君失問是陰陽之事非吉凶所生也 服曰鵠退風咎君行所致

非吉凶所從生襄公不問已行何失而致此變但問吉凶焉在以

爲石隕鵠退吉凶所從而生故云君失問

木疏

案正義曰叔興若以實對當云由君愆失致有此異今乃別以

政刑他占橫說齊亂魯喪自以對非其實恐爲有識所譏故退

而告人以此言也

十七年傳故名男曰圉女曰妾 服曰圉人掌養馬臣之賤者不聘

曰妾

晉世家注

案周禮校人乘馬一師四圉先鄭注養馬爲圉又圉師云掌教

圉人養馬春除蓐斂廐始牧夏庠馬冬獻馬皆養馬之事昭七年傳馬有圉是也廣雅釋詁云圉臣也太司馬序官僅云圉師乘一人徒二人而不以士稱是臣之賤者矣禮記內則聘則爲妻奔則爲妾旣曰聘爲妻則不聘者自爲妾矣

齊侯好內

服曰內婦官也

齊世家注

案莊子逍遙遊釋文內者對外立名婦人居閨門之內故卿之妃曰內子婦官者周宮內宰凡喪事佐后使治外內命婦注內命婦謂九嬪世婦女御其職列於天官是婦官也諸侯制雖稍殺亦當有之服言此者諸侯夫人有定制而傳言齊侯多內寵內嬖如夫人者六人明此六人指嬪御而言故曰內婦官也

宋華子

賈曰宋華氏之女子姓

同上

案成十五年傳二華戴族也是華爲戴公之後史記殷本紀云契賜姓子氏又云契爲子姓其後分封有宋氏是宋爲子姓而華出戴後故曰華氏之女子姓也

雍巫

賈曰雍人名巫易牙字

同上

索隱曰賈遠以雍巫爲易牙字未知何據按管子有棠巫恐

與雍巫是一人也

案周禮有內饔外饔儀禮少牢饋食禮作雍人正義曰此人爲雍官名巫而字易牙也

因內寵以殺羣吏

服曰內寵如夫人者六人羣吏諸大夫也

同上

案如夫人者六人卽上文長衛姬輩六人也羣吏諸大夫者說

文云吏治人者也是在位者皆得稱吏周禮宮伯掌王宮之士庶子凡在版者注王宮之士謂王宮中諸吏之適子也疏云吏謂卿大夫士之總號羣吏卽諸吏而此云諸大夫者所以概卿也晏子曰惟卿爲大夫杜云內寵內官之有權寵者與傳文相違賈義爲長也

十九年傳乃溝公宮 賈曰溝塹也

晉世家注

案塹說文云阮也莊子外物篇釋文云塹掘也

二十一年傳凡啟塞從時 服曰闔扇所以開鍵閉所以塞月令仲春修闔扇孟冬修鍵閉從時從此時也

本疏

案禮記月令仲春修闔扇注用木曰闔用竹葦曰扇孟冬修鍵

閉注鍵牡閉牝也疏曰凡鎖器入者謂之牡受者謂之牝若禽獸牝牡然易繫辭曰闔戶謂之坤淮南墜形訓西極之山曰闔闔之門注闔閉也是闔爲閉而此云開者蓋月令之闔爲門扇管子八觀所云闔閉不可以毋闔襄十八年傳所云以枚數闔荀子儒效所云外闔不閉是也月令仲春陽氣畢達修闔扇義主乎開故曰闔扇所以開也何允曰鍵是門扇之後樹兩木穿上端爲孔閉者謂將扇關門以內孔中疏曰案漢書五行志牝飛及牡亡謂失其鎖次鎖次則牡也案何說固未盡鍵制孔氏以爲鎖次尤非說文云鍵鉉也鉉所以舉鼎也易謂之鉉禮謂之鬲鼎部云鬲以木橫貫鼎耳舉之蓋鬲卽扇儀禮注所謂古

文扇爲鉉也是鼎耳之鍵以木而字从金者繫於鼎言之也然則以木貫鼎耳爲鍵引伸之爲門鍵當亦以木貫門扇矣顏氏家訓引蔡邕月令章句曰鍵關牡也所以止扇說文云關以木橫持門戶也若然則鄭云鍵牡閉牡者鍵爲關牡閉爲關牡矣凡物之相施受者皆可爲牝牡故考工記車人稱車箱曰牝服疏曰謂車較卽今人謂之平鬲皆有孔內軫子於其中而又向下服故謂之牝服也喪大記君蓋用漆注曰用漆者塗合牝牡之中也是棺蓋亦可稱牝牡也鍵自以木爲之故呂覽孟冬紀淮南時則訓作櫂至五行志所云牝牡自指管鑰言之月令修鍵閉下繼之曰慎管鑰鍵與管明是二物鄭注云管鑰搏鍵器

也明管鑰所以搏鍵非管鍵是一物至檀弓注云管鍵也者特互文耳則孔氏指爲鎖次者誤矣鍵閉所以塞者荀子王霸篇注塞謂行不通也從此時謂從此月令仲春孟冬之時也

滑人叛鄭 賈曰滑姬姓之國

周本紀注

案成十三年傳晉呂相曰殄滅我費滑散離我兄弟晉以費滑爲兄弟是滑爲姬姓矣